

廣德州志卷四十

列女志 義烈 貞孝 賢媛

義烈

明

某氏 通志云 逸其姓 原豐都楊邨橋人年二十而寡食貧守節未

嘗出門孝於奉姑一日為姑求蠶於越溪行橋上惡少

戲之婦泣曰天何窘我不能自備一蠶至受外侮投溪

死鄉人義之名其塚曰烈婦墩 萬曆志通志 參吳氏樂府

生員嚴以作妻傅氏建平人以作死托孤女於夫妹閉戶

廣德州志

卷四十

義烈

一

自縊以救復甦乃碎一碗吞之死 通志 邑令朱為請旌 楊志

魯守璋妻雲氏生員士樟女為亂兵所拉欲污之義不辱

通志云兵 怒磔之 兵掖之上馬三掖三墜手拔木椿擊兵兵怒

碎磔之 楊志

生員戈覲妻管氏明季避兵西庄被獲義不受污為兵所

殺 李志

濮陽縈 李志作縈據 濮陽氏譜改 妻丁氏明季被掠不從繫足於馬而

倒曳之罵不絕口遇害甚慘 李志

潘之城妻韋氏建平人年二十一之城疾割股和藥以進

之城死無子立夫弟次子為嗣不兩月子殤氏傷悼夜

扇門投繯而死楊志。通志作夫及殉夫死

吳良琪妻陳氏建平人值亂氏攜幼子出避被執楊志云為兵所

執給以簪珥所藏處遂投井死七日後顏貌如生通志

王命錫妻田氏建平人姑岑氏兩目俱瞽一日聞亂迫之

出氏曰我何忍舍瞽姑往遂被獲逼氏上馬不從以刃

揮之楊志云五臟皆出而殞通志氏年方二十有一楊志

沈支琬妻湯氏建平人宣城湯白女也適支琬值亂父嘆

曰設遇兵如爾輩何女曰此正兒見節時也已而土賊

廣德州志 卷四十 義烈 二

陳君才至楊志云營于靜湯被執欲污之不從以矢穿

腹備極慘毒而死李志。楊志云聞者莫不流涕

右舊志所載前明請旌者建平一人其未言請旌者

本州四人建平四人

附例與完節同

李世榮妻劉氏明初羅沈二寇大掠鄉村夫為所害氏被

劫伴許與俱去令賊守於外入內膏沐遂縱火自焚死

李氏譜

蔡勝如妻沈氏明季夫婦俱被賊擄行至古佛堂氏顧夫

淚下俄自馬上躍入塘中賊怒射殺之屍沉而去勝如

至橫山賊營令牧馬半月餘逃歸往塘邊號泣屍忽浮

出昇歸葬之

蔡氏譜

管良文妻陳氏明末為亂兵所窘義不受污赴水死

管氏譜

王三品妻步氏明季夫婦攜子避兵猝遇賊夫為所執氏

舍子護夫遂俱被殺

王氏譜

生員王鼎元妻步氏生員爾昌女明末遇亂兵欲赴水死

見兵砍其姑臂復從水躍起以身衛姑姑仆地兵執氏

氏怒罵兵以刃斷其唇齒剖腹出其胎血滿草叢卒

王氏

廣德州志

卷四十

義烈

三

譜

王仕義妻施氏明末兵亂夫妻避兵水畔遇兵執仕義氏

抱夫痛哭俱被害

王氏譜

張鏘妻董氏明季寇掠紛起氏被擄號泣罵賊而死

張氏譜

山東安東衛經歷潘廷楫繼妻江氏建平人崇禎十四年

安東失守廷楫死難氏亦同殉時年三十有七

縣申案廷楫

見忠烈

國朝

濮陽宗元妻胡氏年十九歸濮未幾鄰有金木匠頻挑

之氏嚴拒一日越嶺詣伯姆家金瞰知持斧候于山僻

脅不從遂被害康熙二十八年旌通志

宗茂松聘妻王氏名小姑生員濟女建平人年十七未

婚夫殞聞訃卽絕粒夜則閉帷篝燈密製衰經三日後

伺母弟皆寢乃更凶服將原聘釵鈿禮帖納懷袖投繯

死宗氏迎櫬與茂松合葬焉雍正九年旌通志

衛廷璞王小姑歌郎川秋老芙蓉碎一夜清波咽涼吹

芳魂黯慘天為愁口敕巫咸自招致君不見王家有女

姿娟娟束身閨閣方孩穉譬之松栢徑寸莖凜然具有

冰霜氣蹇修前年來致辭百歲絲蘿謂永締河冰未泮

麕已死弱齡詎曉捐軀義形神可滅盟不寒父母諄諄

業許字淚眼入燈如水月鬢髻素紕悄自製猶恐兒夫

廣德州志

卷四十

義烈

四

不相識聘時荆釵應復記從容攜去隨飄風冉冉

乍逢猶却避從今地濶與天長不問人間別離事

右舊志所載奉 旌者本州一人建平一人

張鼎岳妻夏氏建平人年十九歸鼎岳數年而嫠撫再

從姪宗孫為子鼎岳弟鼎美潛受胡姓聘假韋氏祖姑

意邀氏相見氏知之陽應以好語曰我尙欲一見吾子

越三日以吉服行未晚也急召宗孫曰善守父墓我不

能復母汝矣闔戶自經死時年二十六乾隆十七年族

人為之立祠邑令貢匾曰霜松雪栢建平存稿

右建平奉當道獎者一人

盧士廉妻韋氏遭亂與夫避兵山中賊猝至將及士廉氏給賊免夫夫免卽罵賊不屈強挾上馬投地求死賊怒繫足於馬而馳脛折足斷罵不絕口賊以刀截其口兩手持其刃十指皆落遂寸磔之

李志

洪可敬妻彭氏夫負營卒債卒勒以妻償之強立婚紙時總兵鎮桐卒多假威肆橫氏知勢不能已因往卒家至暮自縊死事在順治二年

李志

洪秉誠妻余氏年二十四生一女秉誠客遊不返久絕音問屢逢凶歲紡績易米雜食糠粃或以年少諷厲色

廣德州志

卷四十

義烈

五

峻拒親隣有與之粟者弗受受則織紵以償無何女復歿益深悲咽後得秉誠歿於京邸之訃氏恐人給以奪其志未遽信里人夏雨蒼在京焚秉誠櫬囊骨以歸氏云真贗未可辨也我聞夫婦骨血當生死相親乃解囊齧一指投之血沁骨中指與骨凝若膠合氏遂捧囊號泣脫敝苧衣易錢米虔置祭品祭畢仰天呼曰生不能同室死得同穴足矣抱骨於懷遂自經死家人因合葬焉時年三十七事在康熙二十八年

李志

韋思誠聘妻宣氏把總承陞孫女營兵雲之女也許字

未嫁思誠遠出杳無音信母以貧不能養欲令他適氏
誓不二夫年二十一遂歸夫家獨居自爨食糜粥衣破
縷凡負薪汲水非女流不一假手竇門敗屋夜設一柳
置床頭微有風聲卽擊柳驚衆以禦強暴村前社鼓春
劇十三年足不一到目不一窺雍正八年十一月忽語
諸姑伯姊曰夢夫告以已死無望生還當相從地下矣
遂哀泣不已掩臥不食七日斃命時年三十三李志
吳紹麟妻方氏年二十四夫故無子氏欲殉翁姑命以
育姪爲子而止未幾子又夭氏遂決意絕食而卒時年

廣德州志

卷四十

義烈

六

二十八李志

案舊志所載止此

戈賜祚妻王氏生員伯龍媳儒士鼎伯女也鼎革初避
亂入山爲兵騎所獲挾之上馬氏力與相持騎以其年
少而美不忍害氏奮奪其刀欲砍騎騎還奪之氏十指
俱墜遂爲所殺盛惟豫聞而哀之爲作烈婦詞傳久稿
不全甯皆吉謙續成之戈氏譜

烈婦詞北山鳥南山耦相與避兵一處走山高翮短塵
蔽天雌失其雄鳴不前白刃相接何紛然嗟爾不逐狡
兔逐靈禽我非山鷄野雀逐我何心天崩地坼鳳凰死
深山小鳥安足齒爾不刃吾吾爾刃爾曷以刃試吾頸

與爾刃吾吾自刃爾母以肘加吾衽吁嗟乎山鷄驚野
雀噪靈禽墮地鳴鳶叫毛飛血洒骨肉摧山靈掩泣哀
窈窕當年義士寫新詞此日誰爲續舊詩
君不見至今巖谷裏時時猶聽鳥聲悲

韋應讚妻葛氏順治初土賊剽掠村落氏抱幼子匿山
中倉卒與夫相失賊突至欲劫以行氏厲斥之賊脅以
兵罵不絕口賊忿甚以刀截其口復斷其項隕於山麓
賊退夫跡至氏尙餘一息撫之遽絕

韋氏譜

右據譜增入本州二人以下公舉

楊桂妻姚氏生長委巷年十七適桂桂亦鄉民也未幾
嫠居人慕其美且賢爭欲娶之其父兄受富室金轉餌

廣德州志

卷四十

義烈

七

其翁姑婚有日矣憚氏貞正未敢以聞先微諷之不應
娣姒勸之又不應翁姑乃詬詈之氏跪請曰婦實欲代
夫事公姥縱媳不如子願公姥以守宅犬豕之言訖哭
失聲衆知不可奪謀強劫之氏知之先期晨炊畢徑出
門投井死鄰有汲者驚告倒出其屍衣不露胥視之則
內外衣皆紉合也其從容赴義如此里人因名其井曰

義井

公舉下同

耿志錦妻胡氏年二十適志錦次年十月十日夫故氏
卽欲同殉翁姑勸止至二十六日夜自經死乾隆初年

事

彭廷錫妻高氏幼爲養媳家極貧紡績養姑姑歿廷錫復病故氏年二十五絕粒三日泣曰吾上無舅姑下無子女何用生爲觸夫柩而死里人合葬彭村南五畝山乾隆四十三年事也

貞孝

三國吳

朱曠聘妻羅靜皇甫謐列女傳曰丹陽羅靜者廣德羅勤之女為同縣朱曠所婚禮未成勤遇疫疾喪沒鄰比斷絕曠觸冒經營尋復病亡靜感其義遂誓不嫁與弟妹共居求者過十餘志無傾移有楊祚者多將人眾自往納幣靜乃逃竄祚劫其弟妹靜懼為祚所害乃出見之曰實感朱曠為妾父而死是以託身亡者自誓不二辛若之人願君哀而舍之如其不然請守之以死祚乃舍

廣德州志

卷四十

貞孝

八

之靜守純固年六十餘卒

見太平御覽人事部貞女類

案舊志列女首晉杜義妻裴氏已詳論於前矣羅靜

見於御覽其事甚古風亦最高而舊志反遺之遂致

祠祀闕然可嘆也廣德本漢故鄣隸丹陽郡建安年

孫氏改縣名郡隸如故至晉始隸宣城謚首舉郡曰

丹陽而於朱曠稱同縣是為吳廣德人甚明急錄之

周廣業書羅靜事作時重新節孝祠水凝石泐隨天時貞搃亘古無推移孫吳羅靜最純固彤管有煒燮所貽桐川舊乘本踈漏晉女裴穆徒滋疑士安傳記燦可讀里居姓氏非支離矢死義不辱強暴曰貞曰孝乃無虧祀裴遺羅心殊嘆栗主來歆俎豆宜矧今祠宇重鼎建主持重賴賢官師書此庶用迪彞教豈特月光兼星儀

右新增吳貞孝本州一人

元

阮忠六聘妻周氏幼字阮後聞忠六故奔喪哭泣盡哀自
縊死遂合葬之先是忠六納妾有娠生子銓二雍正八
年銓二後人據譜呈請入節孝祠李志

右舊志所載元貞孝本州一人

附例同完節

沈某聘妻陳氏名英妹幼字沈元末夫遠戍不還誓不嫁
事父道二孝卒葬陳氏祖墓側陳氏譜

廣德州志

卷四十

貞孝

九

右新增本州一人

明

阮燧聘妻夏氏建平夏英六女幼字燧燧亡氏年十二告
父母曰吾將往弔阻之不得遂往撫尸慟哭既謁舅姑
問寢室所在姑示之處則曰宜遷之閣上因誓不還父
母強之出懷中匕首欲引決乃已閣中一婢自侍足不
下梯通志云坐臥小樓四十年諸妯娌有再醮者至輒拒之生平杼
蒯中櫛不與人同其勵操如此萬歷中詔植坊於州西

萬歷志

步漑聘妻趙氏鶴六女許字漑漑客死一塘父母欲更嫁之氏遂經死通志步氏合殯焉知州朱一題其壁曰雙玉

萬歷志

施某聘妻濮陽氏名妙貞琦之女萬歷志許字施姓夫亡設

神主就父家祀焉父轉納他姓聘妙貞誓死不可乃已

守貞終身通志

王良志聘妻呂氏建平人副使呂盛孫女也字良志未嫁

夫歿氏歸王守貞四十五年卒李志

右舊志所載明貞孝本州三人建平一人

廣德州志 卷四十 貞孝 十

附

李世暹聘妻梅氏未婚夫故氏請于父母奔喪遂留夫家

誓無異志年九十二卒李氏譜

右新增本州一人

國朝

王伸聘妻濮陽氏貢生梅女未嫁夫亡請奔喪父弗許

遂扁樓獨居未幾翁又亡氏以孀姑無侍堅請歸王父

始遣之奉姑盡孝撫姪成立李志

鄭素敏聘妻毛氏年十九夫故請奔喪父母不許遂不

食因送歸鄭時已昇柩至山氏會葬畢從人促歸氏遙拜父母決意畱鄭終身不復歸寧撫姪爲嗣設夫位于

樓居止其中長齋素服年五十一卒李

王雲鵬聘繼妻李氏年二十四將嫁夫故聞訃之夕潛

自縊家人救甦遂送歸王事舅姑盡孝撫教前妻子錫

疇遊庠錫疇旋又病故氏復撫兩孫成立李志參王氏譜

右本州三人俱乾隆元年旌舊志所載已旌者止此

陳元吉聘妻洪氏名鳳英年十九聞元吉故請奔喪父

弗許既而欲奪其志遽服滿卒乾隆十五年旌

廣德州志 卷四十 貞孝 十一

濮陽望聘妻王氏年二十李志作十六今從濮陽氏譜改正將嫁夫亡

奔喪守志事姑孝敬備至撫教嗣子瑚遊庠年六十二

卒李乾隆十七年旌案氏載李志時尙未請旌今據准旌年列此

戈時福聘妻駱氏年十七未婚時福故氏奔喪誓守遂

持長齋隨姑紡紝忍饑寒給甘旨撫姪承祧守貞四十

三年乾隆三十七年旌學卷下同

鄭士培聘妻張氏年二十一將嫁夫溺死氏欲奔喪父

不許遂茹素編衣聞有議婚者輒求死客與父言聲稍

下氏卽疑而長慟父解之不得自後戒客聲必揚父知

其志堅送之歸鄭嫡姑夏臥病七年侍奉不倦事庶姑亦如之撫嗣子極慈乾隆四十七年旌

右乾隆五年以後本州奉旌者四人

夏雲翮聘妻李氏年十八未嫁夫亡氏吞環求死不得欲奔喪而翁姑又早亡遂依父母不嫁日以哭夫減明孝事父母衣粗食惡終身

李志

〔案〕李志稱夏李氏稱現請旌今無案可查祠亦未進牌故列於奉旌者之後

潘謙祚聘妻濮陽氏幼爲養媳年十九未婚夫亡矢志

廣德州志

卷四十

貞孝

十三

守貞姑病中風扶掖八年不倦撫嗣子已聘而歿再嗣娶而又歿氏血淚幾枯年六十一卒族爲之立孫焉李彭年聘妻潘氏庠生煥岳女年二十一聞夫死誓不再字時李已無人并無可繼遂依母以終每忌日輒感愴累日

右本州二人據乾隆三十七請旌卷列此

例見完節

沈士鑣聘妻施氏父奇勳浙江金華人祖鳴玉任孝豐教諭氏年二十二將婚聞士鑣死嘔血絕粒堅欲奔喪祖及父母許之至夫墓刺一目以示志已而遂眇時沈

氏死喪相繼家驟落氏侍奉舅姑生養死葬心力俱瘁
後氏父年七十兄弟早世欲迎養而不許氏遂攜嗣子
歸寧勤針黹以養父父卒百計營葬畢乃歸教其子讀
書潔饌以奉師友而身常冬月衣紵乾隆三十七年氏
年五十二提學朱以小東襄七獎之
據給匾
卷下同
濮陽繼聘妻戈氏庠生方國女年十八聞繼死悲憤成
疾父遂送歸濮陽姑憐其少命妯娌勸之觸階求死剪
髮幾盡姑乃命鞠姪爲嗣年五十七卒乾隆五十六年
提學秦額曰皦日盟心

廣德州志

卷四十

貞孝

十三

張克旺聘妻邵氏年十九未嫁聞夫亡卽求奔喪父母
不許欲投繯自盡乃送往張矢志堅守勤紡織以膳翁
姑養葬盡禮撫姪爲嗣今有孫矣乾隆五十六年氏年
六十提學秦以瑤池古雪匾獎

右本州奉當道獎者三人以下建平人

夏文杏聘妻嚴氏名義姑建平人幼讀小學卽知大義
年十七文杏歿氏請于母歸夏守貞足不踰閭邑令貢
獎之曰芳年勁節暨貢去任舟過其門貢夫人欲識氏
命輿迓之氏執禮不出竟以病謝貢益嘉歎而去氏自

歸夏後孝事其姑撫教嗣子年五十四卒縣申下同

姚在本聘妻宗氏名秋姑生員佳女建平人年二十在本故氏欲奔喪其母孀居多病不忍女去許在室持服母歿迺歸姚事舅姑盡婦道撫姪紅李于襁褓之中親教育之氏年三十一而卒比紅李遊庠請于提學朱給匾獎之

王文淮聘妻何氏生員汾女建平人年二十婚有日矣文淮病故氏稟母命往奔喪遂畱堅守翁姑勸之嫁百折不回侍養盡孝逾十年病歿提學朱獎曰葆璞完貞

廣德州志 卷四十 貞孝 十四

韋昌本聘妻王氏建平人年十八聞昌本故欲往父母不許踰年察其志決乃因冰人告韋迎之為夫立後撫教成人邑令周給額獎之現年六十一

蔣家貴聘妻王氏名粹姑建平人年十五家貴故誓不他適時母亡父老氏在家侍養并督教幼弟學恕成人乾隆五十五年氏年四十三蔣氏族衆知氏守貞已久乃為其夫立嗣迎氏祭于夫墓告而撫之邑令周畢前後給匾嘉獎現年五十

右建平奉當道獎者五人

步九寧聘妻王氏年十八未婚夫故奔喪堅守姑憐其少欲爲擇配以死自誓畢生持齋衣素貞孝兩全李志

王南樂聘妻濮陽氏年二十三未嫁夫故氏歸夫家堅

志苦守李志

右舊志所載本州未奉旌者二人以下本州俱據公舉建平俱據縣申

楊正君聘妻李氏年十七正君病歿氏聞訃堅欲奔喪

父嘉其志送歸楊守貞二十年至三十七歲卒公舉下同

雲方夏聘妻陳氏年十六未婚夫故奔喪守貞撫嗣承

廣德州志 卷四十 貞孝 十五

祧年五十卒

戈元愷聘妻濮陽氏廩生日躋女年十八未婚聞夫死

請隨父往送葬既畢父促之歸遂終日飲泣父欲另字

誓死不從父知其志決送歸戈孝事孀姑撫姪爲嗣現

年七十已及見曾孫云

吳元祿聘妻阮氏年十九未婚元祿故聞訃欲奔喪父

母禁之不得乃偕之往哭奠畢乞畱侍姑姑以叔少家

貧婉諭之歸不得已從父返有議婚者輒痛哭仆地後

姑歿氏欲往吳族以其叔未娶且孀於外請仍居母家

為立嗣俟子長迎氏以遂其同穴之志氏勤儉孝養父母父母歿依母母年九十終氏年已五十餘矣兄嫂繼歿撫姪成立今依姪而居操作不倦生平不輕見人居近誓節渡土人無不賢之現年五十九

耿祖漣聘妻方氏生甫彌月耿氏卽養以為媳年十三祖漣故氏矢志守貞孝事翁姑三十餘年如一日現年五十

沈凜弟聘妻甯氏年十八將嫁聞夫死悲憤不食父母憐其就死使告其姑姑義而迎之家素貧隨姑操作繼

姪為嗣仰事俯育絕無怨懟現年四十六

右本州未奉旌獎者六人以下建平人

潘華元聘妻郝氏建平人年二十婚有日而華元故氏稟父母奔喪既至夫家遂不食翁諭之曰殉節易撫孤難汝徒一死孰若撫嗣孫使我子有後乎氏卽遵命撫繼子事舅姑孝慈兼盡子已就傅而氏以病歿年二十

七

縣申
下同

張椽鼇聘妻施氏建平人年十八椽鼇歿氏求奔喪父不許遂屏飾截髮踰三年父母察其志決乃告于張俾

迎拜夫墓畱事舅姑撫育嗣子既娶媳而子歿與孀媳同茹荼苦現年六十有一

謝公瑾聘妻王氏建平人年十三歸謝爲養媳公瑾旋歿氏年雖幼至性過人遂勵志守貞爲夫立嗣而撫育之現年六十有一

方貞女名三姑建平人幼許字歙縣民胡秀仁爲妻年十七未婚聞秀仁故誓不改適處女終身現年六十六
右建平未奉旌獎者四人

伏孝女名琳姑生員仍女秉性端和自離襁褓卽知愛

其父母及祖母稍長侍祖母不頃刻離祖母更鍾愛之年十七字雲未嫁祖母病劇醫謂不治女私刲股以進祖母竟愈而女以血盡而亡時雍正壬子年也

王孝女名政瑞生員德和女德和能文自好政瑞奉親至孝字人未嫁乾隆癸卯母病晝夜侍奉療治靡效因割股和藥以進未幾母死搥胸大慟股瘡迸血而殞州守石聞而嘉之以孝並曹娥額其室

右本州孝女二人

姚貞女名恭姑建平人年及笄未字會母病歿父以幼

子攀舉賴女扶掖遂不急相攸父尋卒遺命俟弟稍長而嫁女性本貞靜卽願終爲處子乾隆十七年邑令貢獎曰閩中貞孝卒年七十四及見其弟有三子七孫云
縣申下同
姚貞女名培姑建平人性孤介母憐愛之遂久不爲擇配及母死培姑年已二十一父欲爲議婚不可且曰三弟俱幼保抱扶持兒當任之恐後母不耐勞也父感其意不復娶後弟皆受室父亦卒培姑已四十矣族老稱其友愛貞一

右建平貞女二人

案二女皆以勇從親命成不字之貞可謂難矣然有室有家父母豈有異心而借遲歸爲鬻子計殊非情理此則漢惠五算之罰不爲過也夫編次列女維風亦以訓俗二女之風高矣俗則未可言厚故綴之末而附論焉

賢媛

明

步傑妻王氏太祖初定中原詔郡邑有能出財造戰船者為海船千長否則派丁為軍守隘王氏獨捐銀三千兩免民遣戍州人義之李志

姚善富妻王氏建平人善富楊志云入太學壬午燕師起

叔父李志云恕以陳迪壻故死節善富又以恕故自經

詔陳屍御史廊下七十五日楊志云初命戮屍繼命氏減家屬遣戍不許收殮

凡三伏闕三上疏楊志云文乃得允歸殯通志

廣德州志

卷四十

賢媛

十九

建陽郡主遼惠王第三女也宏治十八年下嫁葛楠故事尚公主郡主者壻每見行四拜禮主坐受二拜又定制成婚之次日主見舅姑主行四拜禮舅姑答二拜然卒不行建陽之下嫁也儀賓不敢廢拜主輒却避之且執婦禮甚恭艱于生育三年後不復同寢室多置妾媵有子六人愛踰已出主長于吟咏其賦桂花有生在廣寒百花無比之句意殆以自况云葛氏譜

李中丞得陽妻鄭宜人鴻臚序班楷女兩人並容儀絕世飄然若仙中丞為世名卿宜人亦為世聞婦其卒也中

丞痛惜之如失左右手自言余才識不逾中人自起家
邑宰至撫楚清謹一節實資內助之官必與偕相戒曰
士君子守身猶婦人守節脫不顧名檢爲人指摘耻孰
甚焉楚藩之被誣也詔旨嚴切余欲疏白之而未決宐
人曰諫諍分也使畏罪依阿如公論何但言不宐激疏
中引七國之變等語適足觸主怒而重楚罪耳可去之
余大感悟前後三上疏事竟得解他奏疏文檄有關宏
鉅者輒向宐人誦之誦畢以意論斷無不當者宐人未
嘗讀書經籍典故皆由耳學而義理了徹事體諳練或

廣德州志

卷四十

賢媛

三

反出偉丈夫右初余有意學仙宐人亦好黃老故雖情
好甚篤不涉燕昵方病革時余涕下不能止宐人張目
曰君過矣膺國重寄義不顧家奈何嗚咽作兒女態余
爲悚然年五十六卒于官署余誓不復娶旋告歸求長
生之術云子敷章敷惇宐人教之通經術後皆餼于庠
家傳參朱長春墓誌

監生史志尹妻宗氏建平人夫亡守節二子大受大典承

母命捐貲三千餘金鼎建文廟

李志互見完節

國朝

生員葛振先妻王氏幼嫻閨訓及于歸善事舅姑姑性厲諸婦少當意者獨氏能承順之姑亡事舅尤謹值世亂播遷家計窘甚而甘旨無缺振先自塾歸蔬黍必潔窘狀不以告也與伯叔雖析居一味之甘必剖分之後遇死喪撫養其媳鞠二孫如已出爲叔孤女擇嫁罄已女奩飾贈之不更爲女地隣里有急必周卹之義以訓子惠以御下宗黨咸頌之

葛氏譜

贈承德郎庠生陳源遠妻裘安人名族女也八歲讀內則能通大意十七歸陳事姑孝生二子而源遠歿長方舞

廣德州志

卷四十

賢媛

三

勺次僅六齡外侮迭起力持門戶訓其子惇登賢書仕至郡別駕錫成進士爲水部郎官皆其督教之力也惇自言少時嘗述一風聞事安人厲色叱之曰是曖昧也爾日擊乎無其事則人負冤有其事亦敗乃德爾言人事必可與此人覲面言者而後可出諸口也持杖撲責惇跪受之銘諸心卽此可見其義方之訓矣至其勤儉操家力行善事惟恐不及封還惇所寄官物皆有卓卓

可記者 陳氏譜

生員周鼎臣繼妻夏氏生子鳳岐甫七歲而寡氏茹荼

二十年恢其先業訓課鳳岐遊庠初鼎臣欲爲其寡嫂宗道妻張氏請旌而未逮乾隆十九年恭遇

覃恩氏命鳳岐具請獲邀准旌以次子郁繼其後人嘉其

能成夫志

案宗道妻張氏見前

又辛未歲饑氏出米百餘石賑里

中鄉隣多賴以全活者州守帥獎以額曰巾幗能仁周氏

譜

生員周一亮妾沈氏蘇州人與嫡陳同時病瘧陳困臥而氏侍湯藥不稍懈如是三年嫡大賢之子夢霞稍長佐一亮督課之數年嫡及一亮相繼死氏勤儉持家待

廣德州志

卷四十

賢媛

三

族黨御婢僕皆有恩夢霞遊庠後偶輟讀氏怒責曰纔博一衿卽爾顯揚復何望乎夢霞感厲族子維久幼孤收養之蛇螫其足久之瘡潰腥穢不可近氏抱負洗傳人以爲難戚有世父死分當嗣而仍服替者氏正言開諭遂易衰經其曉大義不苟徇俗如此周氏譜

生員陳吾道妻夏氏蘇州人年十八吾道納之越十七年子錫範方娠而吾道病亡嫡施前死遺子殿颺五歲陞颺四歲尙年一歲并所出子女爲五無期功強近之親可倚隻手持門戶鞠育諸雛延師督課殿颺陞颺俱

有聳州序錫範亦補諸生吾道之卒也有應收本年學租若干石爲族人所持或言爭之可得氏曰人之云亡何有於粟竟勿與爭家有二僕頗忠謹殿颺等旣析箸氏曰若勞苦助薪水數十年可久錮之乎命還其券仍各出米三石給之僕感泣去其廉介慈惠多類是壽終七十有三公舉

職員朱秉鈞繼妻徐氏性慈惠善治家事病翁三年無倦容助秉鈞施與借券有不能償者悉還之乾隆丙午歲稔煮粥以賑兩閱月州守穆獎曰惠盈里閭侯有牙

廣德州志

卷四十

賢媛

三

嚮其弟於僧寺贖之歸使賃田自給族姑適岑者貧老無依迎養之他若捨藥施糶殆無虛歲氏之歸也前妻何有子正清甫三歲氏生子正顏正規撫教如一尤憐愛正清令列仕籍嘗述其母德如此今年蓋五十有九云

孫大順妻楊氏建平人翁士俊勤儉起家生三子大順其長也中年病卒弟大漢大受俱敦孝友氏疏布終身針指自給有餘悉以濟人寒則施絮死則捨棺乾隆壬申城中設廠賑粥鄉民日得一餐氏憫之請于翁每傍

晚爲加一餐丙子歲縣令遴大漢督賑北鄉氏輦米百二十四石助之撤厰之日又人給一升全活甚衆晚年積千四百金授大漢大受買石建沙橋于上神港以濟行旅橋成三日氏瞑目逝生平施惠不貲而舅所授田產畱付繼嗣未嘗損耗人服其賢且能焉縣申下同生員李鈺妻周氏建平人五河訓導望之母也相夫以敬鳴機佐讀年踰三十鈺亡望尙幼氏教以父書不稍姑息望遂爲名諸生乾隆丁巳學使鄭獎以松筠勁節時年八十七望已貢成均孫臨吉亦補博士矣望年邁

選官念母不待祿養謝病終於家

閩秀附

生員李帶仙妻史氏淮安府桃源縣人父國柱官廣德營守備攜之任國柱罷官寓郡士李文正家遂以女字其孫帶仙未幾歸淮病故不通問者十數年有墨客汪士玉者新安人也與國柱舊識爲介紹焉康熙甲午帶仙就婚於桃氏年及笄三閱月偕歸桐川氏幼喜書善詩針繡餘閒撫琴弄簫鼓琵琶靡不工妙顧於風土非所宜又性鯁直家人滋不悅離母兄千餘里帶仙常館於外思鄉悵別觸目悲感鬱鬱成疾會帶仙應試宛陵

廣德州志

卷四十

閩秀

二十五

益危苦自度必不起題三絕句并訣別書於所常着紅裙幅上投繯而絕時乙未九月二十五日也去合卺甫十月耳越三日帶仙始歸衣飾悉散亡獨裙畱坐間痛哭將舉付火視之字跡歷歷問家人則皆未見也其詩云愁病慙慙不自持孤魂怕逐曉風吹扶頭強起臨窻坐淚落千行有鏡知腸斷今宵欲絕矣問君何事不來歸君不歸時妾命薄只恐君歸悔妾遲細思有妾不如無夫子歸來莫念奴十月夫妻情已斷願同來世結絲蘿又嘗作夢親詩云何時重拜阿稱堂夜夜愁聽更漏

長漫道長江波浪險夢魂常自到家鄉別兄弟詩云本
是成行雁風來強獨飛未知南北路得再一行歸又薄
命女閨恨詞云傷情極不作男兒終何益女是前生孽
幾箇閨中艷異多少紅顏泯滅墮粉珠樓空自咽化作
啼鶻血其情詞悱惻怨而不怒類如此帶仙亦能詩有
悼亡歌曰嗟哉內子兮從此永訣睹物情傷兮管絃音
絕良辰美景兮空悲殘月狐嘯猿啼兮西風長咽望美
人兮陰陽隔思倩女兮離魂魄畱殘箋于空箱兮心淒
楚而轉側寫餘恨於臨別兮淚漸漬而難讀嗚呼內子

廣德州志

卷四十

閨秀

三

永今世兮女中傑追名媛兮謝家雪咄咄愚夫兮復何
意於佳人而敢云再得

巫鳳武庠燦岳女燦岳善丹青鳳年十三以胭脂寫牡
丹鮮艷若活長讀史漢諸書皆能上口未字人而沒燦
岳痛惜之